

四庫全書

集部

欽定四庫全書

集部

升菴集卷

十三

詳校官編修臣錢 樾

中書臣劉源溥覆勘

總校官原任中允臣王燕緒

校對官學正臣李 巖

謄錄監生臣于時和

欽定四庫全書

升菴集卷十

明 楊慎 撰

跋越絕

或問越絕不著作者姓名何也予曰姓名具在書中覽者第不深考耳子不觀其絕篇之言乎曰以去為姓得衣乃成厥名有米覆之以庚禹來東征死葬其鄉不直自斥託類自明文屬辭定自于邦賢以口為姓承之以天楚相屈原與之同名此以隱語見其姓名也去其衣

乃表字也米覆以庚乃康字也禹葬之鄉則會稽也是  
乃會稽人表康也其曰不直自斥託類自明厥旨昭然  
欲後人知也文屬辭定自於邦賢蓋所共著非康一人  
也以口承天吳字也屈原同名平字也與康共著此書  
者乃吳平也不然此言何為而設乎或曰二人何時人  
也予曰東漢也何以知之曰東漢之末文人好作隱語  
黃絹碑其著者也又孔融以漁父屈節水潛匿方云云  
隱其姓名於離合詩魏伯陽以委時去害與鬼為隣云

云隱其姓名於參同契融與伯陽俱漢末人故文字稍同則茲書之著為同時何疑焉問者喜曰二子名微矣得子言乃今顯之誰謂後世無子雲乎

越絕當作越組跋

越絕一書或以為子貢作又云子胥皆妄說也而越絕二字尤非解者曰絕者絕也謂勾踐時也內能約已外能絕人故曰越絕又曰聖文絕於此辭士絕於彼故曰越絕二說似夢魘譎語不止齊東野人之類而已王充

論衡按書篇云臨淮袁太伯袁文術會稽吳君高豈即其人乎又曰吳君高作越紐錄紐即絕字之誤書以紐名猶漢高之例也絕字曲迂不通而千年之誤無人證之袁康吳平之姓名者在卷末無人知之蓋觀書者鹵莽閱未數簡已欠伸思睡而束之高閣矣余始發其隱然即其書以證其人以訂其名非臆說也博古君子必印可而樂聞之乎

跋趙文敏公書巫山詞

巫山十二峯在楚蜀之交余嘗過之行舟迅疾不及登  
覽近巫山王尹於峯端摹得趙松雪石刻小詞十二首  
以樂府巫山一段雲按之可歌古傳記稱帝之季女曰  
瑤姬精媿化草實為靈芝宋玉本此以托諷後世詞人  
轉加緣飾重葩累藻不越此意余獨愛袁崧之語謂秀  
峯壘嶸竒構異形林木蕭森離離蔚蔚乃在霞氣之表  
仰矚俯睇不覺忘返自所履歷未始有也山水有靈亦  
當警知已于古矣尋此語意使人神遊八極而爽然自

失於擘花温瑩之外欲以表意和趙詞以洗茲丘之黷  
未暇也乃臨松雪墨妙一紙邀曹太狂作圖藏之行笥  
為他日遊仙興端云

跋新刻水經

吳中新刻鄜道元水經規制表演甚精但誤字苦多耳  
誤而相似魯魚帝虎猶可改也所恨為淺陋妄庸者以  
意匠擅加筆削如立碑樹桓本桓楹之桓今乃妄改為  
松栢之栢枉人山本名枉人已見哀江南賦今乃改枉



為柱弱年憲子憲子改切楚人謂子曰憲今不知憲字  
妄改為弱年女子熒山刊石妙在熒字今乃改熒為焚  
何異小兒語耶

跋李陽冰篆書謙卦爻辭

陽冰唐人以小篆著者也其書謙卦爻辭謙字二十餘  
多構別體乃以訥代謙按說文訥多語也从言冉聲地  
名有訥邯縣汝閭切謙敬也苦兼切音義不同相去千  
里乃以充乏術竒徒以此學人所罕習是以欺人如此

豈知千載而下為識者所勘邪

跋韓石溪所藏九都圖

此圖為宋宣和院畫無疑卷首題云江山萬里圖鱣尾  
題云米元暉筆皆眯目而道玄黃者也米氏父子同一  
筆法皆崇簡易殊乏精工此圖樓臺城郭浮圖水石綽  
有唐法恐非虎兒所能企也其云江山萬里亦非也濱  
江安得有九都乎此蓋九都賦圖張平子之西都東都  
南都左太冲之蜀都吳都魏都及徐幹之齊都劉劭之

趙都庾闡之揚都也唐人以九都賦為一卷意必有圖以配之此或其粉本之遺邪中丞南充韓公石溪藏此圖以示慎故輒述所見以印可於大方之家云

跋吳中新刻世說

古書轉刻轉謬良可惋也近吳中刻世說新語右軍清真妄改作清貴兼有諸人之差改作諸人之美聲鳴轉急改作聲氣轉急少有義學改作少有學義皆失古人之意聊一道之蓋不能盡

跋趙東山春王正月辨 三條

昔趙汭左傳補注辨周正改月之證引據既博分析又明可為不刊之論定千古不決之疑獨恨其書不傳故謹錄之然有一條未引今特著之按文選所收古詩十九首非一人一時之作也其曰玉衡指孟冬衆星何歷歷白露沾野草時節忽復易秋蟬鳴樹間玄鳥逝安適此詩文景之世所作也按漢書高祖以十月至灞上仍以十月為歲首則所謂孟冬乃建申之月也故有白露

秋蟬之語蓋秦不師古以建亥為歲首無謂之極漢制大抵襲秦故首十月非係十月至朔上也秦之謬妄不足言然因此可考周正改月之驗何也秦上承周秦以建亥為歲首而謂之春故漢代仍之建申之月為之孟冬矣周人以子月為春從可知矣至漢武帝始用夏正以寅月為首故其詩云孟冬寒氣至朔風何慄慄此孟冬亥月也故有北風慄慄之語武帝以後之詩可知詩可以觀詎不信夫

又

周人之改月無可疑者後世之疑者獨謂詩之幽風用夏正及四月維夏六月徂暑致疑爾趙東山謂詩乃歌謠又多言民事故或用夏正以便文通俗是也然未盡

事情也如今之制官府文書官職稱當時之名而詩文

中稱吏部為冢宰知府為太守又地理之名稱四川為蜀陝西為秦此最明證可知者故不厭博引傍喻也

又

唐儲光羲詩夏王紀冬令殷人乃正月此亦可證蓋周人改月之說唐人不辨而自了然而或以為改或以為不改起于宋人紛紛多議論之口耳

按趙子常之說本于資中黃楚望而加明晰焉但其書今亦罕傳故具錄而跋識之非欲勦說襲蹈也

跋劉南坦岷山圖

元瑞

蘭亭羣賢以長咸集竹溪六逸賓旅無忘曷若香山詩

壇月泉吟社釋九愁而遣五噫具四美而并二難地則  
秔稻交疇里實桑榆陰道春遊秋豫潮往汐來山堂仍  
襲峴首叔子之名畫圖工摹天目王孫之舊緬懷古昔  
繼在今斯僕猿鳥為儔魑魅是禦臨文景仰問訊踟躕  
高步九州徒有子建凌雲之想神交千里慙無長房縮  
地之能狼跋其胡鶴頸長引矣

跋張愈光結交行

禹山張子愈光髮益短才益長齒日衰詩日盛近作結



交行凡七百八十八字紀海內交遊名士著升沉感今  
昔盖高允同徵杜子美八哀之遺意也又作六言三十  
首七言律八首寄予小子則又元白蘇臺皮陸松陵之  
富有也而體裁高古則度越之矣其他觸興口占又不  
可以更僕終或有工於詆訶者曰是不亦多乎哉養生  
何以詩為也揚子解之曰養生奚可廢詩也魏伯陽參  
同一編實建安之先鞭陰長生自叙三詠乃風雅之後  
乘不知昌虛中無論鍾離子養生奚可廢詩也或又曰

為政何以詩為楊子解之曰為政奚可廢詩也重華作歌皋陶載賡神禹有訓五子爰述為政奚可廢詩也或又曰聖學何以詩為楊子解之曰學聖奚可廢詩也孔子刪國風雅頌之詩立溫柔敦厚之教楚狂接輿而歌則欲與之言鮑龍跪石而吟則亟為之下學聖奚可廢詩也子誠有喙三尺予亦試訊一言也豈有駭仙人瘖道學聞有青錢學士矣未見黃齋少師也使伏獵弄麈比翼於鸞鳳是屠羊牧豕皆可為夔龍矣或者之語乃

塞禹山之疑乃醜遂銘其座右曰詩哉明哉詩哉明哉  
予以此忘情以此養生以此為政奚其為為政以此學  
聖奚其學學聖

跋七姬帖

國朝真行書當以宋克為第一所書七姬帖文其冠絕  
也然其事則可疑七姬之死蓋出于潘之逼之謂不幸  
則可非徇節也平居則獲雜子女而漁聚之一旦有變  
恐樂他人之少年而雅經之潘之惡甚矣宋之書人多

珠之故其帖盛傳適以播滿惡耳元末士風類如此上  
下荒淫載胥及溺欲不亡得乎余舊料其情若此近觀  
高季迪弔七姬多麗詞云倩嫦娥呼天試問如何向人  
間生成尤物等閒又把消磨抹羣花亂飄塵土毀聯璧  
碎擲烟波漫說無雙傾城曾數八人少箇六人多一般  
樣細腰裊裊高髻戔戔奈干戈筵上艷曲翻做帳中歌  
忍教受項纏素帛渾忘記臂結紅羅翠被都閒玉鈿盡  
落魂遊應去馬嵬坡誰能發香囊解看怕肉尚溫不堪

腸斷空樓月落廢院春過其事情信無疑矣吁可憐哉  
跋自書小楷春興詩

目有玄花久不作小楷夏日寂居無事乃試一為之李  
重光云壯歲書亦壯如嫖姚十八從軍擁千騎凌沙漠  
目無全虜老來書亦老若孔明以白羽麾軍不見風骨  
而毫素相適筆無全鋒信斯言也若無白羽之能祇見  
皮裘入土空耳余此書將無同耶書成不覺自笑

樊敏碑跋

漢碑多不著作碑文人姓名而此碑之末續書建安十年三月上旬造石工劉武良鐫何也曰古人以鐫石為一難事故書之以傳魏受禪碑書鍾繇鐫以一代貴臣文宗而親雕鐫之役古人之重文藻而必欲永其傳如此顏魯公書恒令家僮鐫之李北海書碑多手自鐫其云元省已刻或云伏靈芝刻或云黃鶴仙刻皆北海自鐫也今之立碑草草而付之拙劣之書鐫者又非良工宜其貽庾子山驢鳴犬吠之誚矣

異魚圖贊跋

予作異魚圖贊間出以示好事者或獻疑曰爾雅注蟲魚定非磊落人子不見韓子之詩乎予曰韓子有為言之也跡其焚膏繼晷之際口吟手披之餘遇蟲名魚字將刪之乎老子云美言不信而五千之言未嘗不美莊子欲絕學而莊子何嘗不學蘇子謂人生識字憂患始豈欲人盡不識字乎如此之類古人善戲謔自揶揄之一機也雖然不可以訓若孔子則豈其然教小子以學

詩終於多識則蟲魚固在其中矣孔子豈非磊落人哉  
近之不悅學者往往拾古人善譎之言以為不肖護躬  
之符可笑且悼充類其說則伏獵弄麈之侍郎長鎗大  
劍之將軍一一皆磊落人也夫

升菴集卷十



欽定四庫全書

升菴集卷十一

明 楊慎 撰

青城五隱贊

范公英炎漢挺生韜華金德潛光玉衡讓王媲美洗  
耳借清漸達鴻羽乎陰鶴鳴

右范長生

天授韜竒入林結茨鳳兮翹翹麟之儀儀年百廿歲有  
嬰孺安山癯澗槁奚可同之

右譙定

岷山逸老藏用隱賢執范寂袂拍薛昌肩高吟弄月長  
嘯揭天遺蹤何在白沙瓊田

右勾台符

白雲先生六詔不起乃如蒲芝  
聯德敵體孟光同曜柳  
妻遺誅有婦人焉五人而已

右張瑜妻曰蒲芝

自贊

臨利不敢先入見義不敢後身諒無補於事業要不負  
乎君親遭逢太平以處安邊歌詠擊壤以終餘年天之  
顧畀厚矣篤矣吾之涯分止矣足矣困而亨冲而盈寵  
為辱平為福者邪

昆明鄺尹陞萬州守歌障詞

瓊瑄南溟帝稱竒甸銅符左篆天假德星既妙簡於鴻  
恩宜特申於燕賀恭惟某官丹山瑞族赤水名駒南嶽  
响嶺之竒英北斗尚書之家世箕裘軒冕合有聞人衣

鉢文章克紹前烈難兄難弟麟儀儀而鳳師師大馮小馮  
印纍纍而綬若若緬茲昆明望邑實惟滇雲具瞻牛鼎  
烹鷄置器固難於適用蟻封試馬未久已見於非常宰  
號神明政成卓異生明作肅百務不留治劇剗煩一訊  
如響扼武夫之吭而奪之氣懾豪右之膽而服其心衆  
謂空谷足音人擬中臺首召京洛雲山外方佇來儀乾  
坤日夜浮暫勞坐鎮搏風以上眷然瀟湘之故人遵海  
而南行矣澄清之岳牧慎殊方倚王逆旅斷金魯擊柝

之聞邦幸邇仁里楚餘波之及晉久庇德隣琴羽未張  
輜駢已駕何以報之青玉案庸假填詞我姑酌彼黃金  
罍聊申雅餞

昆明春水盈盈渡咫尺又銷魂路金馬碧雞遺愛處卧轡攀轅  
留綦解珮望望仙塵去 鴈海鯨波天一柱統統鼓聲催  
欲曙金紫重來還肯許帝加三錫民歌五袴早沛清時雨  
亭衝陟明歌障詞

巫岫鍾靈巴月遙輝蕙澤吳興婉媿滇雲迴化頻洲岳

牧詞人名流堪讚循良君子信史宜書恭惟雲南大邦  
伯鶴峯柳先生神峯瑤峻學海珠澄夙蜚擘花溫瑩之  
聲早膺藻擢蘭臺之選雲端首郡天徽名區襟帶禺同  
咽喉庸濮控南詔西垂之險先東洱北勝之雄帝謂殊  
藩人推奧府官當方面任切股肱咻民于懷協留老蔚  
宗之謔東吏若濕笑成璿宗資之謠鹿逐熊以隨轡馬  
如羊而却廡清崇藻節威服卉裳鈴閣晝閒地有春臺  
之樂銛階星闥家無夜戶之虞菊茲雨塊風條兩岐興

漁陽之詠猶彼苗螟葉蟻三秀繼宣房之歌政成不待  
三年歸猶就水德流已匪一日速比置郵亨衢屆期陟  
明行靚蝸髻鮫叟曷形容于舞之蹈之鳳驛蛟衢難挽  
留于攀者送者假麗藻以展采揚馨芳于聲詩調歸朝  
歡為祖道贈

秋盡汀洲蘋未歇掩映荻花相向折一枝好贈朝天人  
還如鵝鵲樓前雪瓊凹連玉凸五城邊銀為宮闕墀聲  
寒非烟叢裏卿靄瑞雲纈五馬驕嘶虬漏徹鞞靜珮

鳴鶴遙列朱衣引隊奏彤幃天言清問堯階切俞音傳  
袞驚賜金增秩干旄子把勲名昭回青簡身許稷和契

賀薛曲泉撫臺旌獎帳詞

寇恂再借敷青陽百舍之春黃霸重臨沾靈河九里之  
潤政首支郡績最中臺民瘼下蘇譽命上達恭惟某官  
政賜也達守夷之清治所臨而有聲課每上而輒最處  
煩不擾在劇能剗勞以身先風行草偃雷在天上雲行  
雨施消周雅之蘊蟲斥岑瑜之泥鷓七戒三齋既禱千



倉萬寶可期况才識疏通兼政事練達佐郡而譽望洽  
署瀘而廢墜興上上之考特旌元元之論允協慎也卜  
茲揄社寶庇棠陰徐孺子下榻於陳蕃既輝蓬華陸敬  
輿傾盖於姜輔實仰併幪居邦事大夫之賢猥從鳧趨  
之後原田聽輿人之頌敢為燕賀之先

青陽有脚喜五馬重臨江陽城郭南定雲開西岷波靜  
簾捲風清暮早魑化為甘雨露禱不須泥鶴兆萬寶詠  
千箱四野豐年如約 斟酌曾見說老手劇郡利器無

盤錯犬吠花村魚遊春水桴鼓長聞却佇聞考績徵垣  
復報薦名荷索計晨夕鶯遷燕賀金明紫渥

右調喜遷鶯

送薛曲泉之鎮雄勘夷手卷詞

名治

澄清德水天開龍馬之湖洋溢恩波春滿魚鳧之國在  
民高而堪誦叶公論以無踰緬惟馬湖少邦伯曲泉薛  
公湖水竒才鄞城甲族鈎河植洛擬竹箭之穎資騰茂  
蜚英呈天球之秘寶升從赤縣出守朱方西陵有召父

杜母之謠南巴分九里八鴻之潤自公覆露蒞茲江陽  
在昔歌廉薄言觀期月之仁政于今借寇奚必分刺史  
之真符北山賢勞欲息踊躍用兵之策東臺拔命須仗  
填寬迴駕之行昂昂千里駒笈鄙夫畏首畏尾蔚蔚九  
變豹俾小人革面革心惠我無私式迺其歸是祝贈公  
不拜未占有孚則然聊申蚘竅下里之歌用代驪駒在  
門之什

借寇歌廉春有肥皂蓋朱轡輝映江陽郭一呷清泉斟

且酌候人無事閒鈴閣 瘴域嵐方勞鎖鑰靜析沉烽  
虎兕成鸞鶴風颭歸旌詩滿索休遲竹馬兒童約

右調鳳樓梧

孝烈婦唐貴梅傳

烈婦姓唐氏名貴梅池州貴池人也笄年適朱姓夫貧  
且弱有老姑悍且淫少與徽州一富商有私弘治中富  
商復至池一見婦悅之自拊心曰吾無頭風何以老嫗  
虛拘哉乃密以金帛賂其姑姑利其有誨婦淫者以百

端弗聽迫之弗聽加以箠楚弗聽繼以炮烙體無完膚  
終不聽乃以不孝訟于官通判慈谿毛玉亦受商之賂  
倍加官刑幾死者數商猶慕其色冀其改節復令姑保  
出之親黨咸勸其吐實婦曰若然全吾名而汙吾姑非  
孝也乃夕易袿襦雉經於後園古梅樹下及旦姑不知  
之也將入其室挺之手持桑杖且罵且行曰惡奴早從  
我言又得金帛且享懽樂今定何如而自苦乎入室無  
見尋之至樹下乃知其死姑大慟哭之親黨咻之曰生

既以不孝訟之死乃緝嫗心何哭之慟姑曰婦在吾猶  
有望婦死商人必倒贓吾哭金帛不哭此惡奴也尸懸  
於樹三日顏如生樵夫牧兒咸為墮淚每歲梅月之下  
隱隱見其形冉冉而沒有司以礙于府官之故終不舉  
余舅氏喻士積薄遊至池州稔聞其事作詩弔之歸屬  
慎為傳其事嗚呼婦生不辰遭此悍姑生以梅為名死  
于梅之株冰操霜清梅乎何殊既孝且烈汗青宜書有  
司失職咄哉可吁乃為作傳以附露筋碑之跼

倉庚傳

梁武帝代齊錄居齊宮後庭稚齒在潘余之亞者損之又損尚溢乎百數却后心妒焉帝間居一日覽大荒經云倉庚食之令人不妬遂下令虞人收捕此鳥絡野籠山佛首爭獻者盈軒墀乃勅中庖以為宮膳旦旦不繼他肉后與帝食而甘之帝心冀其術之速驗試問后曰此餘甘可以分諸夫人乎后即輟箸不食帝曰荒經曷予欺乎其諸食力尚淺耶將盡脯其餘倉庚中有老而

慧者鼓鞞作人語而稱曰余西裔之羽臣也余祖逮事  
庖羲氏庖羲氏之佐有鳥鳴者主建福是肇百羽命余  
祖曰而仁鳥也其司春候繇茲以還奕世載育及周文  
王邑于岐山西申有鳳鳥者覽其德而下之羣鳥皆往  
從之萃於岐下維時風翔者露翥者雨舞者霜皦者朝  
嘲者夜啜者以萬計復有巴人之比翼蜀山之文翰方  
人之孔鳥善芳不昧翡翠華首咸集宮樹王及後宮不  
之奇也而余族獨著彤管焉其詩曰維葉萋萋黃鳥于



飛為其有助於德象也二號髻戲引弓飛土而逐之后  
曰非所以養童心也戒勿彈周公白文王命羅氏境內  
特賞不捕焉今帝不欲為文王則已欲為文王盍赦微  
軀帝曰爾曷知周文王試為我言文王后妃之德何如  
庚乃喜而躍曰鴛知之鴛知之匪后妃之德實文王之  
烈日者天之明月者地之紀夫為妻綱象日明使婦從  
夫放月紀日載魄於西由媵以升嫡月載魄於東由嫡  
以逮媵帝笑曰禮失乃求諸鳥乎為我說之庚引脰曰

驚何知驚何知月之朝也君以視朔不近內焉后亦辟  
馬月始魄左媵六人送御三夕象微陰也月成魄右媵  
六人送御三夕象漸陰也月成弦三夕而世婦送御焉  
月成采三夕而御妻送御焉月之幾望后當一夕陰將  
盈也月之端望后當一夕陰極盈也月之后望后當一  
夕陰不終盈也自是三夕仍降而御妻三夕薦降而世  
婦三夕還降而左媵三夕復降而右媵及月之夕也君  
以掩身不近內焉后亦辟焉象月以進象月以退授銀

環告進也正金環告退也施玄的告辟也鳴佩玉告節也  
也由勝以升嫡本微而著盛由嫡以逮勝自盛以下微  
勿使陰厭陽勿使柔乘剛嗣續以昌壽命以長此陰禮  
教六宮而頌聲洋溢萬方也又公此制于天下諸侯有副  
宮大夫有側室士有妾當夕侍夜倣是為節當此時豈  
伊無險陂王制鱗之妬亦何能為周制之蕪久矣而欲  
委罪於微禽變性於纖羽不亦異乎且荒經之誕非神  
農之述也帝而信之是不知也沉昵之專非周文之制

也帝而行之是不仁也負此二愆不可以君羽族而况君江東乎帝聞庚言慄然側席却后聞之愾然無色乃命寫其言于斧扆行其制于永巷却后幡然更為逮下之行庚之力也帝喜曰徒信古陳編不如倉庚言乃放之不殺封為金陵郡公唐世有號金衣公子者即其後也

樂湘辭

楚衡余氏尚賓給諫別號樂湘子通顯矣湘之

樂弗忘也乃引疴寧歸其友人楊慎擬楚聲招  
之

楓林遙裔兮湘之流蒙龍鬱葱兮靈源幽浦漱召徕兮  
道逶迤清冷淥淨兮波淪漪文鯨起兮翔鷗浮盼睐楓  
林兮且遨遊美人樂兮無期芳杜生兮猗猗遲莫兮不  
自獻甘淵瀟兮漉漉蕩兮滴水環屈臨瀕洞兮選洄狀  
紆兮鬱思兮淑蛟螭窟鼓枯查兮誰和曲西交夏浦兮  
東顧濡須吞陽吐陰兮涵霄浴虛陽侯是宅兮川后攸

都飄風為信兮零雨為驅玄景霏霏兮翳翳冽冽兮淒淒  
淒依鳧兮狎鷗回汀兮隱洲盼睐楓林兮且遨遊鶴子  
唳兮援侶嗥回鴈鳴兮慕其儔美人兮歸來湘中兮不  
可以久留

無悶篇有序

余也疾疢悶困之日久矣弔影獨坐有冰壺承  
子來自成都惠然過我鳳嬉亭上清談相對積  
日彌旬又見鶴池方池草池三余之名藻欣若

誦之不知沉疴之去體也遂作無悶篇以贈承

子云

易積而難撥者惟悶而已矣况孤臣之謫九年懿親之  
隔千里始心折而骨驚漸形茹而神縈商商玄壺遲遲  
華晷夢糾魄而升魂寤撫膺而鳴指梁高孫原境窮濮  
鉛地則邪龍分浦水則罔象交川酒旗之星有衣笠僕  
之天無椽樹交紺兮嵐靄峰合齡兮郵烟二豎不逢九  
嬰相纏消渴非長卿之病寂寞異子雲之玄折楊笑兮

逝其遠散花念兮久矣捐晉賢空悲蒲柳質鮑令徒傷  
松柏篇悶有結兮誰斷悶有塵兮難澣坐囚山兮鎖愁  
城違樂郊兮去驩館智者不我顧室邇而迹遐佳人  
不在茲庭虛兮情滿若有人兮號冰壺駟斑麟兮乘青鳧  
手携玄峰之綠帙來自芙蓉之錦都攜十洲之瓊藻聯  
三池之璿跗肯問岑兮叩寂同折芰兮焚枯金為膏兮  
玉為醴霞為漿兮雪為腴是日也震滌九陽雲塞四嶂  
出蕭森臨昭曠翼竹颺披柳浪沉痾既失幽悄亦暢冰



壺子起而為留仙之吟曰有矯者龍兮鸞鵠蜚蜚子有  
成言兮今我無違升彼珥之碣聊與子忘機無庸歸兮  
余乃應之曰於菟三無愠潛龍兩無悶戢卿良箴余心  
有開子文子淵伊何人哉

思美人二章寄夏舜俞

渺淮海兮維揚思美人兮增傷鵬何為兮去息龍何為  
兮潛藏松有心兮不改蘭無人兮彌芳秉中情兮欲寄  
非柔翰兮能將

又

渺淮海兮揚州思美人兮增愁蟄魚龍兮日夜避鴻鴈  
兮春秋阻波濤兮浩浩望牛斗兮悠悠我所思兮悵悵  
君何為兮淹留

升菴集卷十一

欽定四庫全書

升菴集卷十二

明 楊慎 撰

古樂府

沅江曲

綠蘿山豁午烟開  
野販山樵競野回  
疊浪高潭渾不畏  
舸艚船上唱歌來

碧天霜冷月明多  
平澧風交湘水波  
夜夜楓林驚客棹  
村村銅鼓和蠻歌

羅甸曲

六首貴州道中

百里馳驅倦三更夢魂歸不辭晝夜苦但使逢春暉

其二

山圍羅甸國水繞的澄橋橋下東流水可惜無蘭橈

其三

寒燈閤孤館陰雲鎖重城長夜恒思曉久雨恒思晴

其四

登山千尋梯下阪九仞井雨潤衣珠融風吹鬢毛冷

其五

蠻樹不凋葉蠻雲不放晴長亭望不見何處是渣城

其六

林間山胡鳥聲啼我前何似故園裏花亭聞杜鵑

關嶺曲 四首貴州

倦枕愁鷄鳴問郎今日程中路不可宿長途須早行

其二

北登鷄公背南望象鼻岬相逢試相問往來定誰難

其三

關索嶺四十三盤高前有安龍菁行人莫辭勞

其四

老鴉關仰樹間靈卜西去何當還

蜻蛉謠

蜻蛉美姜公也公未莅止西郊不聞平息浹年  
公在斯矣聆輿誦采民謠綴茲風耳而目之乃  
知美非溢也

蜻蛉川礮碌野鐵菁窮崖飛鳥不下魁結成羣行白日  
腥風灑繫我髦牛驅犴馬金鷄廟前無行者使君坐紫  
城枹鼓卧不鳴蒼山平洱水清守犬無夜驚行商達天  
明白羽蠹青苗生南山踏歌北山耕願留使君住只愁  
使君去畏途前番君不聞高車駟馬亦使君却商車下  
殷車輪

新春始泛歌 二首

螳螂川水青如苔漕溪寺花紅滿臺韶光滿眼莫惜醉

幾個扁舟乘興來

白沙渡口幾人家紅粉當壚青旆斜梁上新巢早留燕  
門前垂柳暗藏鴉

滇海竹枝詞

羅漢孤峯祇樹林梁王輦道海中心海垠青青堪牧馬  
海眼只今無處尋

東浦彩虹懸水碓西山白雨點寒江烟中艇子搖兩槳

空裏鷺絲飛一雙

滇人喚虹霓為水碓



悲酸行

少日多懼悚老境足悲酸悲酸一何易懼悚一何難遊  
子久不歸憔悴羈南冠親庭隔千里夢中路漫漫年來  
轉漂泊居處無恒安征馬常苦瘦旅席常苦寒有客過  
我門勸我強加餐春陽正發育覆載本自寬窮途謝好  
音白意于青翰

蒙鳩篇

辭家鄉去親愛遠從軍萬里外日暮曠野霜風凍我有

夫行惻營巢寄所蒙鳩語老鷓摘巢抨去之老鷓言此  
鳥是鳳凰抨之恐不祥但可嚇去之不令在我傍鳳止  
鳳飛羽毛摧頽五里一返顧十里一徘徊山川嵯峨嶽  
岑隱阿且飲晨露殮朝霞禍無常門福無常家咄嗟呼  
傷哉謂之何

青蛉行 二首寄內

青蛉絕塞怨離居金鴈橋頭幾歲除易求海上瓊枝樹  
難得閨中錦字書

燕子伯勞相對眠牽牛織女別經年珊瑚寶樹生海底

明星白石在天邊

張云子點升菴詩不喜其深邃而喜其朗爽也

遙夜吟

遙夜吟懷禹山也會阻乎期情見乎辭

明發葉榆城暝逗蘭津渡超忽類飛翰往來如織路僕  
痛馬亦黃簪短帶復長天高行誰問日暮坐自傷鴻飛  
畏逢羅虎飢正出柙寒流泚玄冠涼風吹白恰子有負  
俗累子乃投荒人睽形而比影異習仍同塵晤言能幾

朝契濶還疊夕浪跡苦難并嘉會良易擲翻憶在滇海  
翻思在連然嬿歌花館醉清梵雲房眠丹熒耿遙夜烏  
白牯五曉相望不可晨咫尺限雲杪

舞姬脫鞋歌題畫

潘妃睡起冷金沙弓鞋半脫雙鸞斜越羅襪襯齊紈素  
彩霞搖裔香生步早路金葉白日娥芝田洛浦凌微波  
曳霜回雪下平地琉璃滑澤春雲膩花鬆玉軟嬌無力  
天公一笑生春色寶闌困倚瑤雙跗小玉雙成扶不得

起來翹翠踏芳塵  
粧臺搦鏡重梳勻  
人間絕世誰相并  
月鈎下鬪細鈎新

南中曉寒曲

南中異節候北陸  
戒裘鑪夜凍玉樸  
遼朝寒金畢逋可  
念無衣客誰徵褰與襦

龍編行答禺山

北極軍書一羽過  
南交氛祲九真多  
金潏銅柱天王地  
象渚龍編瘴海波  
渭曲屯田愁葛亮  
關中餽餉急蕭何

嵐開比景鳶低水風度鳴沙馬歛陀自許將軍回白日  
誰憑壯士挽銀河騰峯浴鐵朝乘障下瀨樓船夜戢戈  
翡翠越裳近消息麒麟漢閣遠嵯峨婆婆橫吹驚楊柳  
曄曄商聲響薜蘿隱豹文韜須霧澤荒鷄舞困且漁蓑  
欣聞幕府收才彥佇立衡門聽凱歌

瘴海一作精衛

祚馬行

祚馬出漠西青金護鑿蹄朝駮過歸鴈夕駕軼昆鷄蹠  
雪工升甌陵雲欲舞梯流星迸石齒訝道火龍飛

葵鏡吟贈右溪

花卉中有唐婆鏡者一名羞天花一名倒垂蓮  
本草所謂鬼臼也其花背日與蜀葵正相反曾  
聞其名今始見之托諸聲詩以寄同慨

蜀葵與唐鏡同節復爭鮮蜀葵終向日唐鏡每羞花卉  
木異情性造化均陶甄安得指佞草重植堯堦前

烟丸歌贈製墨毛道士羽周

鷄足烟丸古松心龍眠惜之如惜金玄霜遙分玉兔窟

碧髓近挺青蛉岑茅犀截角光自照栢麝却臍香太侵  
鴻崖羽人故多幻鶴馭明朝那可尋莫辭為我浣霞襟

蘇易簡云鷄足山古松心製墨  
絕佳碧髓青蛉岑見江淹賦

### 征人早行圖

杜鵑花下杜鵑啼烏白樹頭烏白栖不待鳴鷄度關去  
夢中征馬尚聞嘶

### 後緩聲歌

澤藏之山必有陸沉之波物或反其常君將奈之何雌



驍難為雄斧小不勝柯心之憂矣歌且訛復思入淮之  
爵必有飛海之鯨披枝且害心繁實多隕條吐珠誰不  
含曼賁能無招心之憂矣歌且謠

羅甸吟

苴蘭方號鬼貴竹向名羅牛涔枉稱海駿坂猶題坡林  
餘楚箏路棧識漢牂牁久戍勞行惻天高奈若何

笠澤弄三解為潘叅藩父壽

蜀城東望笠澤雲輪困搖曳青氤氳萬里從龍持獻君

將獻君先過里攢鳳笙歌燕喜

五津東下仙舟輕三泖涼波秋水平景丁南極中宵明  
中宵明玄景煥展國容拜家宴

鶯湖小雪梅照天鱸羹尊豉酒如泉錦袍起舞白華篇  
白華篇丹桂曲祝千齡綏百祿

鶯郎行

菰澤鶯郎啞鷓鴣驚飛鴛鴦逐鴨鳩翠袖啼春幽鳳奩  
紅絲穿露空鸞押碧眼胡兒亂馳鵝三五紅顏片時老

今日盈盈滇海花  
明旦蕭蕭陸涼草

青海引

長白山前呼黑風  
桔槔火照甘泉紅  
五千貂錦血邊草  
單于夜帳移湟中  
華林酒艷長庚醉  
沉香春濃海棠睡  
金馬門如萬里遙  
那知青海城頭事

田家喜晴謠

玉女投壺玉皇側  
海童拖霖海天黑  
風花閃日日笑雲

俗以雲氣斑駁謂之風花古詩明月揚帆應復駛  
蕪雲散亂作風花俗諺以雨乍落乍止日光穿漏謂之天

笑雲氣烘為雀頭色須臾變作樓梯天黃綿襖出晒破

磚

諺云樓梯天晒破磚又田叟冬晴見日喜曰天上黃綿襖子出

茅簷夜望犁星沒蘆

絮飛殘水生骨

諺云犁星沒水生骨

明月篇

桂樹生銀漢菱花掛玉臺山明姑射雪川靜海童埃北  
戶燭龍蟄南枝烏鵲來清光殊窈窕流影自徘徊樓上  
盈盈女樽前灑灑杯孤桐不須薦錦瑟正相催

古怨

游樹正丰茸清防深幾重金星長樂漏碧月景陽鍾掃  
粉趙飛燕捲衣秦祖龍粧成獨不見傾國為誰容

補臯魚風木吟為黃月坡政使賦

晨風搖搖有鳥朝嘲不息終朝予心孔勞  
夕風習習有鳥夜咬不息終夕予心孔棘  
樹欲靜兮風則起矣子欲養兮親則已矣  
枯魚銜索兮蠹何泣矣養之不逮兮祭何及矣

楚竹吟

隱枯東方  
朔七諫語

便娟之脩竹寄生乎江潭

針切

歲蕤上防露泠泠下來

風

金切

那知行與栢虛塞兩異心蓬矢射屏草窳落委

荒林夏首西浮遠潯陽南望深大招自抽怨小歌徒悲  
吟天高何難問斯情匪斯今

### 游女行

東風春正韶南浦美人嬌下蔡君休問上官誰敢邀折  
花斜寶珥映水正金翘娉婷惜未嫁應待逐文簫

### 湖艷曲

素足踏金沙波搖半臂霞東風湖滌好疑是孟珠家

江艷曲

交甫江臯見劉晨洞裡逢可憐裾踏鴈不用髻盤龍

思遠道

章丹請輟舞秦青且罷歌佳人上宮出儷嫫復傾娥夜  
月光如練春江紋似羅所思在遠道朱顏誰為斲

竹浪詞

七首為劉珥江賦

新結茅齋近少城清流映帶更多情幽懷似怪王維少

柳浪何如竹浪清

青嵐帚掃紫筠烟  
垂露珠零綠粉天  
最美仙郎能縮地  
篔簹谷在錦江邊

一部清商竹嘯風  
三霄碧霧舞晴空  
披襟已在珠宮上  
宋玉蘭臺賦漫雄

錦籜花裯護笋根  
龍孫蛇祖啟風門  
對青好續涪翁賦  
滴露研朱掛月村

衆竅為噓萬竅號  
調調未定見刁刁  
畫風雄筆君須繼



北海南溟捲紫毫

鸞暮籠烟還漏月  
鳳晨防露更來風  
寬閒不似城中地  
水碧金膏五百弓

一節為船碧海通  
十洲三島訪仙翁  
乘風破浪非難事  
好在垂天萬里蓬

升菴集卷十二

欽定四庫全書

升菴集卷十三

明 楊慎 撰

古樂府

海估行 二首

海估帆乘錦浪飛  
綃宮夜取萬珠璣  
翻身驚起蛟龍睡  
血污清泠竟不歸

偃月堂空罷舞塵  
靖安坊冷怨佳人  
芙蓉蓮子隨他去  
不及當年石季倫

吳楚行

神女巫山上西施越網中朝雲迷楚國夕露滿吳宮舞  
榭青楓樹歌臺綠蕙叢伍員魂已斷宋玉賦休工

涉江采芙蓉

沉沉秋水灼灼芙蓉花葉葉凌清霜枝枝明朝霞娟  
娟東隣子采采惜芳華昔時贈同心今日悲天涯欲寄  
苦無因向風長歎嗟

代古日出行

晨登石巒望浮雲何相羊飄風自東來若木迴其光景  
曜薄萬里下界猶蒼涼曾崖自鬱鬱芳萑含春霜草蟲  
一何微感物鳴其傍天池有黃鵠一舉知圜方

靈菊篇效陸平原

靈菊植幽崖擢穎凌寒飈春露不染色秋霜不改條三  
泉漱玄根九陽晞素苗衡星散光晶香氣何飄飄東林  
生玉樹西畹生蘭翹懿此歲莛茂感彼芸黃凋采為仙  
人食十載通一朝金童酌霞醴神女彈雲璈顧視西王

母翠髮如陵茗

方云真選體

雙燕曲

有鳥名飛燕雄雌自相將飲君玉池水巢君文杏梁美人當軒坐恐沈羅衣裳請君駮除之君憐不忍傷雛生八九子嬌愛比鳳凰鳴聲何啾啾聞我庭東廂習飛還不遠墮雙扉旁主人戒廬兒毛羽無摧戕不啄五株桃不啖五畝粱秋風從西起翩翩向南翔昔為黃口兒今為烏衣郎辭巢謝主人華屋恩難忘願主壽千歲歲

歲巢君堂

方云有風有體

扶南曲

五首

春人辭曲房羅綺雜花香  
遠思河邊草柔情陌上桑  
歸來庭下路羞見紫鴛鴦

愁窺綠綺琴絃澁不成音  
鏡裏春春貌窻前夜夜心  
臨印人去遠離夢繞花陰

清歌發皓齒良夜足歡娛  
誓好同心結迎祥百子圖  
千金當一刻城上莫啼烏

遊賞上春時  
踟躕望所思  
花嬌初學臉  
柳淺未成眉  
問訊溝頭水  
微波可致辭

淇上輕盈侶  
巫陽縹緲仙  
晚歸因鬪草  
春困為秋千  
羅帳含雙笑  
燈昏尚未眠

烏栖曲 四首

金蓮作杵瓊瑰砧  
蛟龍艷錦鴛鴦衾  
并刀未剪燕霜落  
何日征衣到沙漠

晝漏迢迢春灑灑  
草如柔扇花如焰  
白日紅窻恨轉多



箇儂無計奈春何

汝南鳴鷄烏白鳥強顏饒舌催天曉  
殘粒相送淚闌干  
月帳雲屏生曉寒

月華二八星三五  
丁丁漏水粲粲鼓相思相憶阻河橋  
可憐人度可憐宵

方云真得齊梁風致而不流

宛轉歌

明河拂幌月栖簷  
驚鳥號林螢入簾  
美人遙夜歌宛轉  
羅衣不綻宮黃淺  
愁聽更漏轉分明  
統統樓頭五鼓聲

梁白紵舞歌 二首

仙人六著帝臺棋高張洞越吹參差二八遞代三商移  
含嬌杏彩闕容儀流雲不度華星遲鑪火九微燈九枝  
騰觚飛爵朱顏怡傳空引漏客忘疲滿堂不語心相知

又

英英白紵雪色光機杼出自寒女房裁作舞衣雙袖長  
吳娃魏粲自相將宛轉顧步雙鴛鴦儼若星月舒其芒  
髮如結旌體如翔秋葯被風蘭裊香回身再拜捧瑤觴

千秋萬歲侍君王

方云雖使沈約復生亦當心服

桂湖曲送胡孝思

君來桂湖上湖水生清風清風如君懷灑然秋期同君  
去桂湖上湖水映明月明月如懷君悵然何時輟湖風  
向客清湖月照人明別離俱有憶風月重含情含情重  
含情攀留桂之樹珍重一枝才留連千里向明年桂花  
開君在雨花臺隴禽傳語去江鯉寄書來

方云流麗

大堤曲

大堤二三月垂楊千萬把上枝堪藏鴉下根堪繫馬藏  
鴉繫馬晚樓邊沉水香焚清酒傳紅霞宛宛歌聲外漢  
水團團明鏡前夜飲朝眠歡不足秋去春來芳草綠只  
知郎索盡黃金不道妾顏銷白玉江有方洲岫有沙牙  
檣絲纜各天涯釵橫花困驚殘夢不信行人不憶家

冬晴 三首

冬晴連月歲欲闌北屋修影迴南巒行人喜舞農人歡  
負耒杖策各自返過涉不愁溪水寒

又

岸梅春動江不波  
玉顏粲粲回鏡柯  
橘洲霜晚繁香多  
吁嗟二物堪贈遠  
如此萬里關山何

又

岷山白日多光輝  
清江澗霧雪霏稀  
魚龍不蟄鴻雁飛  
塞上將軍未解甲  
城南思婦夜縫衣

阻風曲  
子磯作

三首

峭石驚磯橫浦口  
朔風半夜蛟龍吼  
一枕波濤萬里心

江水客愁誰淺深

行人夜唱江南曲  
巴歛楚些遥相續  
聲聲怨暝復愁更  
訴盡離情天未明

啼猿峽口江流遠  
回鴈峯前沙磧晚  
水驛梅花開未開  
緘情千里寄陽臺

幡幡中林葉別內兄黃峻卿

幡幡中林葉迢迢語離別

玉溪云宛轉有風致

離別不可親相思

隔南津南津首北路莽莽入烟霧  
夙昔欣芝蘭痾體成

歡顏只戀携手好豈知行路難前有一樽酒絃歌清商  
曲行子唱驪駒主人彈別鵠別鵠影悠悠寄音下西州

一言展契濶再言申綢繆

玉溪云情到興  
到古意古體

### 垂柳篇

楚雄苴力橋有垂柳一株婉約可愛往來過之

### 賦此志感

靈和殿前艷陽時忘憂館裏光風吹千門萬戶旌旗色  
九陌三條雨露姿蒼涼苑日籠燕甸縹渺宮雲覆京縣

芳樹重重歸院迷  
飄花點點臨池見  
臨池歸院總仙曹  
應制分題競彩毫  
詔乘西第將軍馬  
詩奪東方學士袍  
金明綠暗留烟霧  
舊燕新鶯換朝暮  
只知眉黛為君顰  
肯信腰肢有人妬  
從此沉淪萬里身  
可憐憔悴四經春  
夫離散木甘時棄  
攀折荒亭委路塵  
搖落秋空上林遠  
婆娑生意華年晚  
腸斷關山明月樓  
一聲橫笛清霜坂

江干行答禹山

吳娃江干采芙蓉  
陳王洛浦賦遊龍  
忽驚繡帶香風起



漸覺羅裳珠露濃不緣織女星邊見定是嫦娥月下逢  
逢君薦枕對襄王別君解珮悲交甫青雲窈窕曼聲歌  
綠水迴環垂手舞鸞歌鳳舞無雙人燕歲鶯年二八春  
百未蘭生延夕漏九華采燈爛晴晝金屏花裏活秦宮  
寶帳香中隱韓壽迴黃轉紫返復間得新捐舊須臾後  
舊人顏色昔曾新新人恩愛行當舊舊人紅袖泣前魚  
新人翠羽綴燕裾阿嬌怨賦金難買蘇蕙迴文錦不如  
濁水清塵坐長歎空留可憐誰相於

華燭引

華亭席上酒闌樂闋禹山張子愈光誦梁人燭  
賦碧玉舞罷羅裳單之句歎其警絕而惜其非  
賦體也抽毫製紙屬予增損其辭以為華燭引

六螭稅駕眠虞淵三爵行栖珠樹烟雲母疏窻花作地  
茱萸繡帳錦為天銅芝抱蒂復纏柯金藕相縈共吐荷  
紅貫彩暈迎雨歇蜜催香焰送風過桂華漏促頻銷麝  
蘭燼天寒不畏蛾徐吾東壁機絲少郢相南方書誤多


菖蒲傳酒座欲闌碧玉舞罷羅裳單留雲影射荆王枕  
泣露光搖漢帝盤攬帶盈盈君不見脫纓脉脉兩相看

又別擬製一篇

紫霞西沒白日陰蘭膏明燭洞房深蛾飛迴向蓮臺度  
螢燭平臨桂炷沉鶴露雁霜驚早寒寸心斗酒奉君歡  
火齊蟠烟全的皜銅荷垂燼半闌干座中碧玉好名倡  
清醺曼睩爛齊光燭花剪作雙胡蝶蠟淚融成兩鳳凰  
便面障眉掃蛾綠搔頭墜髮渲鴉黃綺結交窻窻拂曙

金匱銷香香滿絮星翻漢回奈若何顧影徘徊送君去  
六朝初唐之作絕響久矣往年吾友何仲默嘗  
云三百篇首睢鳩六義首乎風唐初四子音節  
往往可歌而病子美缺風人之義蓋名言也故  
作明月流螢諸篇擬之然微有累句未能醇肖  
也升菴太史公增損梁簡文華燭引一篇又別  
擬作一篇此二篇者幽情發乎藻繪天機溢於  
靈聰宛焉永明大同之聲調不雜垂拱景雲以

後之語言外史小子含緩讀七八過飄飄然有  
凌雲之思灑然獨醒不覺骨戛青玉身坐紫府  
也噫吾與古人交久矣吾與仙人遊久矣安得  
起仲默九原而共賞之耶張含跋



升菴集卷十三

欽定四庫全書

集部  
升菴集卷十四至  
六

詳校官編修臣錢樾

中書臣劉源溥覆勘

總校官原任中允臣王燕緒

校對官學正臣李巖

騰錄監生臣于時和

欽定四庫全書

升菴集卷十四

明 楊慎 撰

古樂府

關山月

迢迢賤妾隔湘川  
杳杳征人戍朔邊  
分弓營對珠龜缺  
掛鏡臺臨玉兔圓  
紫塞風烟白  
登接黃河波浪黑  
山連何時空外嬋娟影  
來照樓前歌舞筵

淮南子蚌蛤珠龜與月盛衰

足唐人句效古塞下曲



長榆塞上接龜沙  
碎葉城邊建虎牙  
夜夜月為青塚鏡  
年年雪作黑山花  
蘇武白頭持漢節  
文姬紅淚泣胡笳  
可憐苜蓿迷征馬  
誰見蒲桃入內家

燕歌行東程以道

玄羌白狄起邊埃  
翠旆朱綬選將才  
玉弩驚天連馬邑  
金精埽旦過龍堆  
甘泉宮裏兜零舉  
疎勒城邊汲綆摧  
射虎暝中聞暗吼  
落鵬雲外墜清哀  
五千深入衝寒雪  
十萬橫行殷霹靂  
楊柳先春旗葉展  
芙蓉不夜劍花開

錦車持節夫人至，貝帶弋弓驕子迴。  
逐北朝移行幕府，受降秋上古輪臺。  
青樓月對庚方出，紫塞風從丑角來。  
擬縛名王歌林杜，肯思中婦詠條枝。

新曲古意

凌波洛浦過陳王，躡步邯鄲綴舞行。  
鸞尾鳳頭爭嫵婉，麝臍龍腦鬪芬芳。  
巫陽臺上春先到，漢月樓中夜未央。  
結網喜蛛垂藻井，營巢睇燕宿梅梁。  
金仙素掌晞金露，玉女青腰裹玉霜。  
翠織屏風交屈戌，紅羅斗帳掛香囊。

膩鬟斜墜烏雲滑  
脂體橫陳白雪光  
詞賦楚王憐宋玉  
畫圖天老教軒皇  
生憎露鶴催宵急  
死恨星鷄促曙忙  
肯信王嬙嬪絕國  
紅顏清淚泣玄羌

題唐人閨秀熨帛圖

碧梧葉落紅閨晚  
玫砧敲月催金剪  
重重海簾銀蒜垂  
曲曲山屏皂羅展  
廣儲懸月月  
初臨緹幕染霜霜  
已深  
禁痺銖衣圍夜玉  
嵯峨寶髻辟寒金  
雲母箱開同心鎖  
鈎鈎香浮九微火  
秦篝齊縷鬪紛華  
蜀錦吳綾分婀娜

熨帛申繒憶遠行遙遙夜夜不勝情百層妾住垂花塢  
萬里君居碎葉城垂花碎葉音塵隔春去秋來感行跡  
深閨心斷結蠶絲絕塞眼穿無鴈帛明燭蘭膏照獨眠  
蛾眉曼睩為誰妍試看裴羽相思夕何似徐吾共績年

禁痒又作冉弱  
嵯峨又作倭墮

休洗紅憫山東流賊之亂也

休洗紅紅顏薄命恨難窮蛾眉傾國誰家女十五纖腰  
媒未通金屋盈盈嬌白日錦窗的的玩春風戎馬一朝

生冀北黃中萬騎滿山東金繒賤棄如泥土絕色爭擒  
獻鎬鋒火燒野田飛墅鴨雲映東方生蟬螻飄零自分  
身如葉憔悴誰甘首似蓬當時不識門前路今日能彎  
馬上弓婦女何能堅節操丈夫本自不英雄

古艷曲 二首

皎皎復盈盈傾國更傾城珊瑚絲結網苔華玉篆名宮  
女多相妬非關君薄情

珊瑚網西施事出吳越春秋逸  
篇見劉克李義山詩註夏后氏

一美女茗華刻名琬琰玉茗  
是琬華是琰先汲冢瑣語

掩顰來玉塞顧影戀金門翠燭勞光彩銀屏役夢魂羅  
衣香未歇猶是漢宮恩

邯鄲才人嫁為廝卒婦

序曰予觀樂府有邯鄲才人嫁為廝養卒婦特  
亡其辭亦失其解及考史記張耳傳洎楚漢春  
秋并云趙王武臣為燕軍所獲囚於燕獄先後  
使者往請輒為燕所殺趙有廝養卒謝其舍中  
曰吾將載趙王歸舍中人笑之乃走燕壁以利

害說燕將燕以為然乃歸趙王廝養卒御王以  
歸武臣歸趙以美人妻養卒以報之是其事也  
予觀養卒有戰國策士之風太史公書其事文  
既奇樂府歌其事亦奇矣六朝及唐人擬作者  
皆似眯目道黑白雖吾鄉太白亦迷其原昔吾  
亡友何仲默一日讀焦仲卿妻樂府謂予曰古  
今惟此一篇更無第二篇也凡歌辭簡則古此  
篇愈繁愈古子庶幾焉可作一篇與此相對子

謝未遑然亦未有茲奇事直當之也去今二十  
年屏居滇雲平晝無事散帙見此事思與仲卿  
事適類復憶仲默言乃操觚試為之以成此篇  
惜不使仲默見之永昌張愈光亦仲默文字友  
也遂徃一通以寄愈光云

團團桂花樹生在邯鄲宮翩翩翡翠鳥結巢丹桂叢花  
紅何灼灼翡翠何雍雍宮中有才人顏色如花紅青雲  
為雙髻明月為雙瞳十三阿母側十四深宮中貞心比



筠竹榮華如茂松左手抱齊瑟右手揮吳桐紫綺為綢  
繆紈素為裁縫獺髓明點點龍涎薰褶襖楚蕖華跗薦  
燕支唇硃融揚子江心鏡百鍊照膽銅複帷鎮文犀列  
錢銜壁釭被繡共命鳥席坐同心狨蜻蛉唳鳳子鷄翹  
濯鳧翁春襟燕乙乙曉寢蟲蕭蕭芳池七十二寶帳三  
千重名用琬琰刻臂用絳紗封昔似河中鳶今從雲中  
龍雲龍不可繫河鳶那得從君王好遊獵將軍射飛鴻  
青樓臨大道層城俯雕甍燕兵北方來陣馬如蟻蠂惡

氛起廣陌襄國迷旌幢悠悠俄轉轂去去成飄蓬暮看  
月出西朝看日出東君王不可見日月光瞳矐湛盧失  
吳劍烏號亡楚弓左將名飛虎右將名飛熊前軍千人  
俊後軍萬人雄中軍張與陳耳心餘腹同前使叩燕壁  
後使躡前蹤去節何揚揚歸魂杳斃斃後車戒前覆咫  
尺不敢通王宮懸賞格賞格厚且隆侯印方斗大金帛  
嵩丘崇不愛印懸斗不愛金堆嵩宮中有才人顏色如  
花紅青雲頭上髻明月眼中瞳十三阿母側十四深宮

中逝將脫薪樵歸來取華容將軍問何人竈下廝養童  
軍中駭且異駭異交譏諷爾廝一何蚩爾養一何恣爾  
去何當還無吉祇有凶左將名飛虎右將名飛熊前軍  
千人俊俊軍萬人雄往往不生還纍纍形影空齟齬虎  
狼叻嗟嗟么麼蟲養卒含笑言君豈知我衷君亦勿賤  
賤君亦勿庸庸君亦勿少少君亦勿窮窮勿以江海流  
棄捐溝與澗勿以芝蘭芳棄捐菲與葑勿以椒櫨貴棄  
捐薤與葱君道如踐棘我道如折蔓君道如探湯我道

如撥糶我去車搖搖我來鼓鼗鼗朝發趙北際暮望燕  
南衝沐露轉磨笄戴斗徂崆峒行行日已夕停舟易水  
陰當門報燕將言有趙使臨使者問燕將試言探臣胸  
燕將語趙使爾欲得爾王趙使笑不止爾語賸且霧燕  
為唇齒國趙為輔車邦張耳與陳餘饑鷹待勁風交遊  
如父子遊秦聯翼遊一朝仗馬筮下趙數十城各有南  
面志機會不巧逢勢屈武臣下立王持趙心趙地今已  
定趙王為燕擒耳餘握趙柄武臣受燕籠王歸二人臣

王囚二人公肯迎生王輦惟逆死王軼死王良實願求  
王但虛名王魂化燕氛二人喜無忤內舉全趙勢外折  
弱燕鋒問罪始有名仗義不待攻王今兵在頸行見雉  
離量臣來弔燕禍不求歸趙功燕將色如土燕王胸如  
春乞爾趙王歸急歸在匆匆出門不復顧仰天荷高穹  
養卒御王歸喜氣如渴虹前歌揚金鑣後舞蹈錦幪荆  
卿羞督亢陳馳慙遷共惠公返曲沃句踐復吳淞山川  
再清朗天地重昭明智靡秦檣里勇冠夏逢門銅斗笑

刺客玳簪惡談朋三軍咸嘖嘖衆口交喁喁升為堂上  
賓永脫竈下烘張筵列樽俎烹羔宰肥豨纍纍繫印綬  
瑟瑟穿玲瓏陽阿七盤舞中山酒千鍾厚賞陳前墀養  
卒辭未終宮中有才人顏色如花紅可憐桃李子降作  
糟覈供始笑周尾生抱柱流寒淙復笑蘇季子愚婦不  
下綬陳餘娶公乘張耳婚外黃持將比才人才人姣無  
雙宮粒揚嫖都野態減妖穠殷勤語才人才人莫心忪  
好去偕新郎新郎非蚩氓繁華少佳寶麗色幾歡悰請

看古美人命薄恨常濃  
驪姬死晉市西施沉吳江  
黃鸝悲陶嬰蝴蝶怨韓馮  
為汭兩皇英南望九疑峯  
斑竹淚點點瀟湘波  
洵洵章華貯巧笑細腰如黃蜂  
峽夢啼露猿江眺傷青楓  
阿房三十六烈燄驚丰茸  
娥娥摠薄命嗚嗚歌懊懣  
相逢恨靡蕪相思苓芙蓉  
爾名播樂府爾芳輝管彤  
寄謝東隣子學步休言工

贈沐錦衣

仙山名五華迨迨上烟霞  
道逢兩仙童駐鶴問仙家

家住仙村木門蒼琅根英英衆公子楚楚諸王孫舍後  
有碧梧鳳皇將九雛鳴聲何啾啾聞我蓬萊壺兄弟八  
九人中子執金吾木公酌醴泉金母斟雲腴塤篪吟何  
曲歷歷種白榆大婦七襄女中婦重輸妹小婦無名字  
彷彿秦羅敷丈人且安坐日出東南隅

月團茶歌

唐人製茶碾末以酥滯為團宋世尤精前自元  
代以來其法遂絕予效而為之蓋得其似始悟唐



人咏茶詩所謂膏油首面所謂佳茗似佳人所謂綠雲輕挽湘娥鬢之句飲啜之餘因作詩紀之并傳好事

膩鼎腥甌芳醕蘭粉槍末旗香杵殘秦女綠鬟雲擾擾  
班姬寶扇月團團蘭膏點綴黃金色花乳清冷白玉瀾  
先春北苑移根易勺水南灑別味難

珠履曲

漸臺織女跂東足

甘氏星經織女東足曰漸臺

襪羅不染銀河綠飛

下天邊三素雲來舞人間八琅曲白紵繚繞豐趺光掌  
中無力踏春陽共命縷纏雙躡蹠同心絲繡五文章  
娟輕盈邯鄲步嬰跚勃宰漢宮妬香裾漏影蝴蝶飛蘭  
膏明燭翳霄暉金杯潑灑浮金影玉山摧頽假玉寢夢  
裏俄驚月入懷醒時却訝蓮生枕雪皺霜皺起夜來花  
歌柳弱臨高臺牽牛呼龍種瑤草不遣仙蹤印歸道笑  
殺梁家與石家折腰香塵何足誇

飛燕詠

飛燕元傾國合德更聯芳歌舞平陽第膏沐溫柔鄉涎  
涎宮中去雙雙天上翔露華白英粉沉水九迴香李文  
明襪練石花凝袖粧金釭星列影珠帳月齊光避風遠  
條館沃雪浴蘭房香湯不沾體仙飈空引裳吹簫慶安  
世持履馮無方嬌愛豈終極榮華安可常禍水一以浸  
炎光允不揚莫誦伶玄傳徒令樊女傷

善哉行

夏夜苦短冬夜苦長日月既逝春華秋霜

一解

山川嵯峨懸日孔多豈無車轅淹留匪他

二解

獸有朋攜鳥有羣飛顧瞻中林旦往夕歸

三解

海色東起明星晨墜美人在遠寢不聊寐

四解

同心異鄉意遐思長思來何如彈琴中商

五解

附書來鴻翩翩空疾願爾千里勿遇繒緯

六解

### 梅花落

古樂府有梅花落曲唐人諸家作者多矣皆詠其開不言其落也旅行松次適見梅花落乃援

舊題以成新曲雖有愧緣情庶不謬體物云耳  
落梅復落梅千片復萬片願借鼓芳風吹入披香殿

其二

古梅飄古香新梅綴新粧那枝傳妾恨何樹近君鄉

其三

梅落復梅開流光似流水君心在梅花妾意憐梅子

其四

團思更團情依幌且依楹朝朝粧靨靨日日望卿卿

合歡詠

合歡為樹夜合朝開枝葉繁互望若蟠糾風至  
扶疎了不相牽綴古人所謂青囊蠲忿者也覽  
晉人楊芳之詩聊繼聲焉

可憐合歡樹生我庭東  
廂枝枝相糾結葉葉復飄揚  
烟交疑覆帳風散若分香  
戢華踐西柳開艷啓東  
桑周詩驚采綠楚夢感昏黃  
贈君以蠲忿與妾同芬芳

峽東曲

白帝到江陵一千二百里欲試一日程須待春水起布  
帆一百尺出自三梭織風順早歸來天際遙相識

七夕曲

此夕知何夕令秋似去秋涼風兼遠思併在最高樓

盤江行

貴州

可憐盤江河年年瘴癘多青草二三月綠烟生碧波行  
人好經過

七盤勞歌

一盤谿谷低仰首愁攀躋巖崖白雲上鳥道金天西  
二盤行漸難谷口野風寒石磴愁旋馬行人各解鞍  
三盤雲霧堆側徑轉紆回前旌正延佇駿騎莫相催  
四盤連翠微峰日隱晴暉石齒啣人是樹枝骨人衣  
五盤勢更高俯見棲鳥巢巖巒暫相倚人馬同時勞  
六盤窮攀援真如上青天瞰已峻絕上望更巍然  
七盤險棧平眺望倚分明西征通蜀道北望指秦城

朝天嶺



落日半山坳掩映粟葉赤行客早知休前溪多虎跡

將進酒

清醕如濟濁醪如何君子有酒旨且多我當起舞君當  
歌歌烏烏舞傿傿歌舞未終良夜過我首既濡君顏酡  
古稱賢達日飲無何人生安樂孰知其他

將進酒杯行遲主人且勿喧君子有所思堯置中衢尊  
文王法酒旗共此融融歡無愆抑抑儀令汝年壽等喬  
松名與金石期將進酒酒且終樂相樂樂無窮

張禹山  
云辭古

調高義存鑒戒與淳  
于對齊王語相似

鷓鴣歌

紺宇流霜豆房冷華燭蟠烟舞交影中有一人字鷓鴣  
飛爵騰觚盼斜領蓮花漏水夜無多莫將金滴比銀河  
願為楚女巫巫山之行雨不願作甄后洛浦之凌波

楚妃引

金缸銜壁隨珠燭美人如月嬉華屋明星爛爛接朝霞  
笑殺蘭膏誇宋玉

宵獵南夢赴長莽火似雲鯢駮雷鼓同車獨共龍陽君

織腰美人空楚舞

莽叶莫  
補切

升菴集卷十四

欽定四庫全書

升菴集卷十五

明 楊慎 撰

五言古詩

白雲岩為謝左溪賦

名廷芝

紅雲擁帝居紫雲蔭仙錄白雲何悠揚舒卷岩之曲震  
澤昔從龍液池曾下鵠出岫本無心懸車返初服憬彼  
入深林芟然在空谷風聽弘景松露採淵明菊菊露綴  
明珠松風韻球玉九牧謝兩龔三間諧二陸何日和雲

謠西池春草綠

衍古諺

漢時諺云殺君馬者路傍兒其言雖小可以喻大衍為一篇感時撫事亦有諷云

天馬龍為友來自渥洼池青絲為之絡黃金為之鞿圍  
人新承命剪拂下瑤墀騎出橫門外茸茸春草時東城  
接南陌觀者咸嗟咨弄臣矜迅足長鞭終日施汗血忽  
憔悴筋力盡驅馳未樹邊隅績徒為冶遊疲始信殺君  
馬端是路傍兒

題交甫解珮圖

交甫之楚遊息影依喬木道逢兩仙姝逍遙漢臯曲星  
宿綴明璫雲霞裝魁服婉變蕩熒魂花艷驚凡目目隨  
鞦韆揚魂與芳風逐結夢擬陽臺交辭同阿谷榮華橘  
是柚貞芳笋成竹江永不可方微波春自綠

別陳玉泉

玉人將遠別投贈瓊數篇惠而能好我裴徊病榻邊感  
此萬里行曷月重周旋秦地四方樞神臯接英躔八水  
忽橫流九峻俄震騫來旬屬大雅申畫寄名賢平成紹

禹績玄圭獻堯天參井與岷嶓星土元相連應念滄浪  
叟好音遘鴻傳

送張嶺山職方還銅梁

佳脩

郊扉偃江介炎天方鬱煖燕居感離索蝸廬森蒿萊高  
人千里駕空谷楚音來研精既理窟抽毫更逸才玄韻  
紫房洞清吟文昌臺同聲起予和笑口為君開檣烏五  
兩發蘭鷁雙櫓催晤語擬傾蓋永懷盈酌壘願言植嘉  
樹湛思肄條枚三峨遲屐齒七襄冀瓊瑰

續東坡狂雲妬佳月

狂雲妬佳月  
蜉蝣撼大樹  
佳月了不嗔  
大樹何曾輕  
薄  
晒王楊羣兒  
謗李杜光燄  
萬丈長江河  
千古注勿言  
人可欺大言  
終自誤

懷音篇寄張惟信學士

張名潮

昆池望漢沼  
漠徼視梁岷  
音耗兩迢遞  
眺聽一傷神  
他鄉非故園  
濁水限清塵  
捐脰徒佇想  
送軀邈何因  
有客來天末  
未開緘慰飢  
渴殷勤訪死  
生綢繆申契  
濶光儀歛



若親窮愁暫如撥萬里向炎隅五載困羈孤山川夢張  
敏岐路泣楊朱燭龍屢遷舍胎蚌幾盈虛情隨瘴嵐結  
魂與迴飈俱憶昔承嘉會弱植連英蒂明輪仰重離麗  
澤資雙允取則芥睨柯同聲竽混籟曳珮步文昌抽毫  
逼華蓋鳳波接鷄栖退食競招攜黃山上林苑玄灞曲  
江堤齊鑣拾瑤草對榻然青藜郢客傳歌妙周郎顧曲  
迷傳歌還顧曲懽移成別促寧知嚶鳴鸞忽作徘徊鵠  
去去背榮宴行行赴嚴督三陟阻且長百罹紛交屬考

樂豈中阿離索異西河螭頭輟彩筆鶴膝擁瑠戈北道  
主人少南方遷客多碧鷄冠層嶺赤虺隣荒景闔荆坐  
剗跡剪茅旋栖影樵爨分獠烟桔槔通甗井鼓腹畏含  
沙延頸愁添瘦臬獍笑邊陲篁竹跳蠻酋孳家竄草莽  
乘障襍兜鍪乞糧公山氏貸粟監河侯蓬翹隨樹羽桃  
梗泛苔漚風霜瘁精力蒲柳凋顏色居夷寡鳳嬉求仙  
拙鷓息衰白歲不與昏黃日下稷新日詎相聞久要難  
見君皎皎共明月悠悠間白雲棄置勿復道伊誰竟此

云天山蘇子卿遼海崔亭伯缺望洛陽城銷志長安陌  
跛鼈羞驥伍委羽非鴻翻下溟饒薄田東臯餘廣澤還  
鄉尚有期從君訪黃石

元謀縣歌

遙望元謀縣塚墓何累累借問何人墓官尸與吏骸山  
川多瘴癘仕宦少生回三月春草青元謀不可行九月  
草交頭元謀不可遊嗟爾營營子何為歟來此九州幸  
自寬何為此遊盤

書李前渠藩伯公便面

望塵斗以北傾蓋江之陽命駕慰遲暮倚樓訊行藏  
下榻沈疴失擁篲端憂忘玉藻敷溫麗金薤披琳瑯  
淪詩綴四始逸籀括三蒼荒經詢夏后汲冢懷周王  
賡臯既旦旦聆摯何洋洋維時首朱夏迅晷改青陽  
歎言移日稷彥會屬辰良蒲葵聊短詠木桃愧申章

九月三日見新月

時有悼亡之感

纖纖初生月掛我高樓  
傍常時照歡影  
今夕流悲光  
悲

光正徘徊悵望相思臺涼霑露襟濕爽透風幃開絲蟲  
繞階緝火螢穿箔來更添漏水咽膏減釭花催莊休歌  
不發潘仁心已推商陵別鶴怨梁樹栖烏哀未抵此時  
恨長歎獨難裁

恩遣戍滇紀行

商秋涼風發吹我出京華赭衣裹病體紅塵蔽行車弱  
姪當門啼怪我不過家行行日已夕扁舟歇潞沙揚舲  
天津口回瞻見牛斗風吹紫荆樹月照青楊柳逆流沂

漕河相顧慎風波  
荒村聚豺虎  
夾岸鳴蛟鼉  
僕夫困牽挽  
防吏苦嗔呵  
徐沛洪流溢  
滄溟浴白日  
聚落鷄犬空  
銜鱸羽毛疾  
暗灘持楫防  
洄溜揚帆慄  
維纜依鶴巢  
蹇蓬適鮫室  
乘月下呂梁  
侵星過白楊  
漫岸憬失道  
孤舟鬱相忘  
喧飀見疊浪  
極眺無連岡  
陰霞互興沒  
凍雨條淋浪  
溼薪戒傳火  
空囊愁絕糧  
信宿萬籟平  
隣舟動歡聲  
聞鷄共起舞  
買魚賀兼程  
夕泊秦淮岸  
朝逗維揚城  
愁聽玉簫曲  
懶問瓊花名  
畏途險已出  
勝地心猶驚  
真

州對瓜步分岐當去住翹思鐵甕雲悵望金陵樹江浮  
懼濤瀾陸走淹霜露移船鷺洲來弭榜龍江隈故人同  
載酒一醉雨花臺高臺多古今百慮盈疎襟琴彈別鶴  
怨笛喝飛鴻吟臨風惜南鷺揆景恨西沈江程始掛席  
江月照采石招搖西北明水霧東南碧銅陵夢裏過赭  
圻望中隔潯陽見市廛湓浦異潮汐馬口歌獨漉魚山  
候風宿西塞漁父磯東陵道士汎估客歎浮萍放臣悲  
落木秋驚赤岸楓霜謝黃州菊龜山漢陽縣鵠磯遙可

見披襟倚山閣開圖對離宴鮮飈蘋末來餘霞波外絢  
枕底鳴飛湍舳際失江千仙子駐鶴嶠王孫鬪鴨蘭雲  
開君山出壑歸洞庭寬乾鵲噪危檣連連一何迅試叩  
巴峽船果得家鄉信時序感孤懷風烟集雙鬢江陵初  
解颿倉皇理征衫家人從此別客淚不須絨騰裝首漠  
路問愁程楚巖楚水縈沅澧楚岸秀蘭芷古墓識昭丘  
遺坊號珠履珠坊青蕪繁昭丘白雲屯傷心楓樹林回  
首桃花源天寒行旅少歲晏霜霰煩界亭四十渡羸馬



不成步幽篁豈見天密箒才分路營窟半弁裳人烟盡  
槃瓠戾蟲嘯落景暴客當官戎驅車先發昫投驛遲暝  
霧溼浦涔陽連龍標夜郎天遠遊弔屈子長流悲謫仙  
我行更迢遞千載同潛然一葉崇安渡千波竹箭急鬼  
方昔云遐羅甸今初入陰霾暄凝交瘴嵐曉昏集長亭  
此驛遙咫尺如棘澁石行蹶昆蹄沙炊咽蒸粒斷腸盤  
江河銷魂龍從坡軍堡鳴笳近蠻營荷戟多三辰晦光  
彩七旬歷滂沱罽衣行風舞蘆篷跳月歌可憐異方樂

令人玄鬢皤烟霜窮瑣旅  
莖若開芳序迎睫平原來  
還顧殘山去喜見青松林  
却辭黃茅嶼滔滔歲已周  
望望且夷猶衣塵何暇拂  
足繭不能休碧鷄儷金馬  
滇海昆池瀉五尺常頰道  
萬里唐蒙野隋將仆碑川  
漢相連營下我行更向西  
綿力倦攀躋礮碌穿危磴  
蜻蛉控絕谿點蒼明霽雪  
抱珥飲晴霓蒲塞重關峻  
蘭津毒草低枝寒鴟鳥下  
花煖杜鵑迷湖環蜮射渚  
暖入象畊畦瑩角髦牛鬪  
斑文笮馬嘶緬書塗貝葉  
熨照燧松梯風景他

鄉別天倪吾道拙雲山已亂心風塵仍結舌出門各自  
媚失路為誰悅桑落豈忘憂光觸詎申結龍吼雄劍鳴  
騏歌唾壺缺蒼蒼七星關幾時却東還瀟瀟三峽水奚  
啻隔中沚黃犬代書郵青龍借歸舟鴈翼翔寥廓猿聲  
遞阻修何由一縮地暫作錦江遊

出嘉陵江

嘉陵駛且長千里如投梭洋洋者綠水觸石揚白波凌  
逸似有情相送出褒斜雲氣接江腦日色破浪花冥冥

下無極疑是神龍家垂藤飲猿狖淪淪棲陽阿中有南  
行舟遙遙通三巴惜哉不可往巨石劇狼牙我欲鏡安  
流手中無莫邪長歌行路難日莫猶天涯

峭關行

晨行峭關道此道一何難曾陵高不極脩坂回鬱盤季  
冬十二月時節正嚴寒馬蹄踐霜雪車轍帶罔巒凌澌  
正豎洹河水無汎瀾通達結凍溜改徑陟嶺岼四望少  
烟火鳥路俯鴻磐悲風號古木響入玄雲端居人盡塞

向行者為槃跚野狼嘯昏侶饑鴈短晚翰迢迢村郭遠  
行行未解鞍凜凜歲方晏去去程猶寬勞歌以詠志釋  
此越鄉嘆

集弘法寺後圃小山

黃鳥語春晚青林生夏陰禪宮靜鐘梵寧知車馬音率  
爾成佳過晤言良所欽對酒俯樓殿步履陟丘岑謀野  
既有獲在遠亦會心懷哉幽寂地茲遊可重尋擾擾望  
城闈欲去愧塵襟

於離會作

遙遙事行役落落無安居奉義徂江漢成旅候軺車密  
親念睽隔賓筵集華裾流聲何肅穆照夜交瑛璵率爾  
拜嘉貺何以報相於烟霜易淹留日月方向除曲湟浮  
綠藻太液敷丹渠欲嗣北來音托之西上魚

玉溪云宛  
曲有味

升菴集卷十五